



REPUBLIKA E SHQIPËRISË  
KËSHILLI I MINISTRAVE

**PROJEKTVENDIM**

Nr. \_\_\_\_\_, datë \_\_\_\_ . \_\_\_\_ .2026

**PËR  
MIRATIMIN E RREGULLAVE DHE PROCEDURAVE TË RINOVIMIT  
PËR AUTORIZIMET INDIVIDUALE PËR PËRDORIMIN E  
FREKUENCAVE TË DHËNA ME KONKURRIM PUBLIK**

Në mbështetje të nenit 100 të Kushtetutës dhe të pikës 4, të nenit 70, të ligjit nr. 54/2024, “Për komunikimet elektronike në Republikën e Shqipërisë”, me propozimin e ministrit për Infrastrukturën dhe Energjinë, Këshilli i Ministrave,

**VENDOSI:**

1. Miratimin e rregullave e procedurave të rinovimit të autorizimeve individuale për përdorimin e frekuencave të dhëna me konkurrim publik, sipas tekstit bashkëlidhur këtij vendimi.
2. Ngarkohen ministri i Infrastrukturës dhe Energjisë dhe Autoriteti i Komunikimeve Elektronike dhe Postare, për zbatimin e këtij vendimi.
3. Vendimi i Këshillit të Ministrave nr. 496 datë 22.7.2014 “Për miratimin e rregullave dhe procedurave të rinovimit të autorizimeve individuale për përdorimin e frekuencave të dhëna me konkurrim”, shfuqizohet.

Ky vendim hyn në fuqi pas botimit në Fletoren Zyrtare.

**KRYEMINISTRI**

**EDI RAMA**

# **RREGULLAT DHE PROCEDURAT PËR RINOVIMIN E AUTORIZIMEVE INDIVIDUALE PËR PËRDORIMIN E FREKUENCAVE TË DHËNA ME KONKURRIM PUBLIK**

## **Neni 1**

### **Kushtet ligjore për rinovimin e Autorizimit Individual**

Autorizimi individual për përdorimin e frekuencave të dhëna nga Autoriteti i Komunikimeve Elektronike dhe Postare (AKEP) me konkurrim publik sipas parashikimeve në ligjin nr. 54/2024 “Për komunikimet elektronike në Republikën e Shqipërisë”, rinovohet vetëm nëse:

- a) në përfundim të afatit të vlefshmërisë së tij, sipërmarrësi mbajtës i autorizimit individual për përdorimin e frekuencave, ka përmbushur të gjitha kushtet e përdorimit të këtyre frekuencave të përcaktuara në autorizimin individual dhe ato të autorizimit të përgjithshëm në zbatim të përcaktimeve ligjore për këtë qëllim;
- b) nuk ka detyrime që rrjedhin nga aktet dhe marrëveshjet ndërkombëtare, ku Republika e Shqipërisë është palë, që kufizojnë rinovimin e autorizimit individual;
- c) në Planin Kombëtar të Frekuencave, nuk ka ndryshime në përcaktimet për përdorimin e frekuencave që janë pjesë e autorizimit individual;
- d) AKEP nuk ka filluar ndonjë procedim administrativ për mospërmbushje të kushteve të të drejtave të autorizimit, sipas parashikimeve në pikën 7, të nenit 69 të ligjit nr. 54/2024 “Për komunikimet elektronike në Republikën e Shqipërisë”.

## **Neni 2**

### **Aplikimi për rinovimin e Autorizimit Individual**

1. Aplikimi për rinovimin e autorizimit individual të dhënë me konkurrim publik, bëhet nga sipërmarrësi mbajtës i autorizimit individual, para përfundimit të vlefshmërisë së autorizimit sipas afateve të parashikuara në nenin 70, të ligjit nr. 54/2024 “Për komunikimet elektronike në Republikën e Shqipërisë”.
2. Aplikimi për rinovim nuk përfshin rastin e zgjatjes së afatit të të drejtave të përdorimit të parashikuar në pikën 3, të nenit 69, të ligjit nr. 54/2024 “Për komunikimet elektronike në Republikën e Shqipërisë”, i cili aplikohet në rastin e autorizimeve individuale për përdorimin e frekuencave të dhëna për herë të parë, sipas këtij ligji.
3. Aplikimi për rinovim i paraqitur nga sipërmarrësi, shoqërohet me një informacion të sipërmarrësit mbi përmbushjen e kushteve të autorizimit

individual dhe të autorizimit të përgjithshëm.

### **Neni 3**

#### **Verifikimi paraprak i kërkesës për rinovim**

Me marrjen e aplikimit për rinovimin e autorizimit individual, për përdorimin e frekuencave të dhëna me konkurrim publik, AKEP brenda 15 ditëve pune, para vlerësimit të përmbushjes së të gjitha kushteve të autorizimit individual, verifikon nëse ka pengesa ligjore për vijimin e procesit të rinovimit të autorizimit individual lidhur me parashikimet e pikës 8, të nenit 66, të ligjit nr. 54/2024 “Për komunikimet elektronike në Republikën e Shqipërisë” si dhe sipas pikave b, c dhe d, të nenit 1, të këtij vendimi.

### **Neni 4**

#### **Konsultimi publik**

1. Me përfundimin e vlerësimit fillestar, sipas nenit 3 të këtij vendimi, AKEP kur arrin në konkluzionin që nuk ka pengesa për vijimin e procesit të rinovimit, zhvillon një proces konsultimi publik me palët e interesuara, përfshirë sipërmarrësit e ndryshëm nga mbajtësi i autorizimit individual në fjalë, në përputhje me nenin 44, të ligjit nr. 54/2024 “Për komunikimet elektronike në Republikën e Shqipërisë”.
2. Në njoftimin për konsultim publik, AKEP publikon informacion mbi frekuencat për të cilat kërkohet rinovimi, rrjetet e komunikimit dhe shërbimet që ofrohen përmes tyre, si dhe fton të gjitha palët e interesuara të shprehin mendimet e tyre rreth këtij procesi rinovimi, me qëllim vlerësimin e kërkesave të tregut për keto frekuenca, si dhe kur është e nevojshme kërkesat për mbulim dhe cilësinë e shërbimeve të ofruara përmes këtyre frekuencave.
3. Procesi i konsultimit kryhet nga AKEP përmes faqes së tij zyrtare, për të paktën 30 ditë.

### **Neni 5**

#### **Procesi i vlerësimit i të gjitha kushteve të autorizimit individual**

1. Në përfundim të konsultimit publik AKEP bën vlerësimin e detajuar të përmbushjes të të gjitha kushteve të përdorimit të këtyre frekuencave, sipas autorizimit individual dhe atij të përgjithshëm, duke marrë në konsideratë në veçanti kërkesat për:
  - a) mbulimin e territorit dhe popullsisë me shërbim, si dhe fortësinë e sinjalit

- (fuqinë e transmetimit);
- b) zbatimin e kushteve teknike të funksionimit, të nevojshme për shmangien e interferencave të dëmshme dhe kufizimin e ekspozimit të publikut ndaj fushave elektromagnetike;
  - c) përdorimin dhe shfrytëzimin efektiv të frekuencave, në përputhje me rregullat dhe standardet e përcaktuara, si dhe afatin e vlefshmërisë së përdorimit;
  - d) cilësinë e shërbimit/ve dhe tarifat për shërbimet e ofruara nëpërmjet rrjetit që operon, sipas rregulloreve përkatëse të nxjerra nga AKEP;
  - e) kryerjen e pagesave;
  - f) transferimin e të drejtave të pronësisë për përdorimin e frekuencave dhe kushtet për këtë transferim;
  - g) detyrime për aktet dhe marrëveshjet ndërkombëtare ku Republika e Shqipërisë është palë;
  - g) kriteret e përgjithshme sipas pikës 5, të nenit 69 të ligjit nr. 54/2024 “Për komunikimet elektronike në Republikën e Shqipërisë”;
  - h) detyrime të tjera, të marra përsipër nga sipërmarrësi gjatë pjesëmarrjes në procedurën e konkurrimit publik.
2. Në kuadër të procesit të vlerësimit të përmbushjes sipas pikës 1, të këtij neni, AKEP analizon gjithashtu dhe investimet e kryera nga sipërmarrësi për shtrirjen dhe konfigurimin e rrjetit të ndërtuar, për të operuar në frekuencën/brezin e frekuencave, gjendjen ekonomike dhe financiare, impaktin social dhe ekonomik të veprimtarisë së tij, që vërtetojnë se sipërmarrësi mbajtës i autorizimit ka kapacitetet për të vijuar përmbushjen e detyrimeve të autorizimit individual.
  3. Në procesin e vlerësimit sipas këtij neni, AKEP merr në konsideratë çdo evidencë nga konsultimi publik lidhur me kërkesën e tregut nga sipërmarrësit e ndryshëm nga mbajtësi i autorizimit individual në fjalë.
  4. Gjatë procesit të vlerësimit AKEP, kur e vlerëson të nevojshëm, i kërkon me shkrim sipërmarrësit, informacion më të detajuar lidhur me përmbushjen e kushteve të përdorimit të këtyre frekuencave, sipas përcaktimeve të parashikuara në pikën 1 të këtij neni, si dhe të dhëna të nevojshme, në referencë me përcaktimet e pikës 2 më sipër.
  5. Sipërmarrësi aplikues, me marrjen e kërkesës nga AKEP për informacion shtesë, sipas pikës 5 të këtij të këtij neni, dërgon informacionin dhe të dhënat e kërkuara, brenda 10 (dhjetë) ditëve pune nga data e marrjes së kërkesës.
  6. Brenda 10 (dhjetë) ditëve pune nga data e depozitimit të informacionit, AKEP-i, kryen vlerësimin e përmbushjes të të gjitha kushteve të përdorimit të këtyre frekuencave sipas autorizimit individual dhe atij të përgjithshëm dhe miraton raportin përmbledhës të vlerësimit të paraqitur nga grupi i punës të

ngritur për këtë qëllim. Raporti përmbledhës i vlerësimit shoqërohet me një propozim mbi çmimin referencë minimal për rinovimin e autorizimit individual.

## **Neni 6**

### **Përcaktimi i çmimit minimal të referencës**

Propozimi për çmimin minimal të referencës, shoqërohet me argumentimin e AKEP-it për caktimin e tij. Ky propozim bazohet në parimin e objektivitetit, transparencës, jo diskriminimit dhe proporcionalitetit, merr në konsideratë zhvillimin e konkurrencës, interesin publik dhe mbrojtjen e konsumatorit, rrethanat e tregut dhe përdorimin efektiv të frekuencave, si dhe mendimin paraprak të palëve të interesuara, si dhe mban në konsideratë praktikatat e zbatuara në rajon dhe në vendet e Bashkimit Evropian për procedurat e ngjashme.

## **Neni 7**

### **Propozimi për ministrin**

Në vijim të miratimit të raportit përmbledhës të vlerësimit, AKEP-i ia paraqet atë ministrit, duke i propozuar vijimin e procedurës sipas këtyre rregullave, nëse rezulton se sipërmarrësi aplikues i ka përmbushur të gjitha kushtet e përdorimit të këtyre frekuencave sipas Autorizimit Individual dhe atij të Përgjithshëm. Propozimi i AKEP për rinovimin, mban parasysh përmbushjen e objektivave të përgjithshme të nenit 5 të ligjit 54/2024 “Për komunikimet elektronike në Republikën e Shqipërisë”, si dhe kerkesat e pikes 3 te nenit 60, te ligjit nr. 54/2024 “Për komunikimet elektronike në Republikën e Shqipërisë”, n lidhje me mbulimin dhe shoqërohet me një propozim mbi çmimin referencë minimal për rinovimin e autorizimit individual.

## **Neni 8**

### **Procedura e negocimit**

1. Ministri, me marrjen e raportit të vlerësimit dhe propozimin mbi çmimin referencë minimal nga AKEP-i, në rrethanat që sipërmarrësi plotëson kushtet e parashikuara në kuadrin ligjor dhe atë rregullator për këtë qëllim, brenda 10 (dhjetë) ditëve pune nga data e depozitimit të tij, urdhëron ngritjen e Komisionit Ad-Hoc për Negocimin e Rinovimit të autorizimit individual (Komisioni i Negocimit).
2. Komisioni i negocimit drejtohet nga ministri përgjegjës për komunikimet elektronike dhe përbëhet nga jo më pak se 5 (pesë) anëtarë, përfaqësues të

ministrit përgjegjës për komunikimet elektronike, Ministrisë së Financave, Ministrisë së Drejtësisë, Ministrisë së Ekonomisë dhe Inovacionit dhe Autoritetit të Komunikimeve Elektronike dhe Postare.

3. Nuk mund të marrin pjesë në Komisionin për Negocimin e Rinovimit të autorizimit individual, personat që përbëjnë konflikt interesi me sipërmarrësin aplikues, sipas kuptimit të ligjit “Për konfliktin e interesit”.
4. Çdo anëtar i Komisionit nënshkruan një deklaratë, përmes së cilës deklaron se nuk ndodhet në kushtet e konfliktit të interesit.
5. Në urdhrin e ministrit për ngritjen e Komisionit të Negocimit përcaktohen tagrat e Komisionit, përfshirë përcaktimin e afatit të fillimit dhe përfundimit të periudhës së negocimit.
6. Komisioni fillon negocimin mbi bazën e çmimit minimal referencë, të propozuar nga AKEP-i. Komisioni gjatë negocimit mban parasysh përmbushjen e objektivave të politikës së sektorit dhe programin e zhvillimit ekonomik të vendit.
7. Gjatë procesit të negocimit, Komisioni i Negocimit, mban parasysh që frekuencat janë një pasuri kombëtare me vlerë ekonomike dhe rëndësi sociale e kulturore.
8. Palët në negocim përveç çmimit mund të negociojnë edhe për mënyrën e pagesës. Komisioni i Negocimit mban procesverbal për të gjitha takimet e negocimit. Me përfundimin e procesit të negocimit palët nënshkruajnë aktin e dakordësisë në tre ekzemplarë origjinalë.
9. Ministri, mbi bazën e aktit të dakordësisë, brenda 5 (pesë) ditëve nga data e depozitimit të tij nga Komisioni, njofton AKEP-in dhe sipërmarrësin aplikues, për kryerjen e procedurave standarde sipas rregullores për autorizimin e përgjithshëm dhe atë individual të AKEP-it, për regjistrimin e njoftimit dhe pajisjen e sipërmarrësit me autorizimin individual për përdorimin e frekuencave të aplikuara sipas legjislacionit në fuqi.
10. Pagesa e rinovimit të autorizimit individual derdhet në buxhetin e shtetit.

## **Neni 9**

### **Dispozita kalimtare**

Për autorizimet individuale të dhëna me konkurrim publik, para hyrjes në fuqi të ligjit nr. 54/2024, dhe që afati ju përfundon brenda vitit 2026, kërkesa për rinovim të autorizimit individual paraqitet në AKEP jo më vonë se 90 ditë nga përfundimi i vlefshmërisë.

## **Neni 10**

### **Dispozita të fundit**

1. Në mungesë të shprehjes së interesit nga mbajtësi i autorizimit individual, ose në rast të dështimit të negocimit për pagesën e rinovimit, AKEP-i ndjek procedurat e parashikuara sipas nenit 75 dhe 76 të ligjit nr. 54/2024, “Për komunikimet elektronike në Republikën e Shqipërisë”, për dhënien në përdorim të frekuencave.
2. AKEP-i në rastet kur procedura e rinovimit ka filluar brenda afateve ligjore, por nuk ka përfunduar para përfundimit të vlefshmërisë së autorizimit individual, si dhe në rastin e mungesës së aplikimit për rinovim brenda afatit ligjor, mund të marrë vendim të ndërmjetëm, bazuar në nenin 67 dhe 68, të Kodit të Procedurës Administrative për shtyrjen e afatit të vlefshmërisë së autorizimit individual. Afati i shtyrjes në çdo rast nuk kapërcen afatin ligjor për vendimin e ndërmjetëm.
3. I gjithë procesi për fillimin e procedurës së rinovimit të autorizimit individual, rezultatet e vlerësimit së përmbushjes së detyrimeve dhe aktet e ministrit janë të hapura për publikun.